

JBPM sedia hadapi banjir

Kota Bharu: Jabatan Bomba dan Penyelamat Malaysia (JBPM) Kelantan tetap mengambil langkah berjaga-jaga menghadapi kemungkinan bencana banjir lebih besar hujung tahun ini.

Pengarahnya Azmi Osman berkata, pihaknya tidak boleh ambil mudah walaupun Jabatan Meteorologi Kelantan menafikan maklumat viral mengatakan bakal berlaku banjir dua kali ganda lebih besar di negeri ini berbanding tahun lalu pada hujung tahun ini.

Beliau berkata, pihaknya menerima maklumat viral itu sebagai amaran bersiap sedia dari semua aspek terutama dalam urusan menyelamatkan dan membantu masyarakat jika iabe-nar-benar berlaku.

“Kami mengambil langkah mengadakan kursus kepada Jawatankuasa Kemajuan dan Keselamatan Kampung Persekutuan (JKKKP) September depan untuk dedahkan apa yang harus dilakukan jika air naik mendadak sebelum pasukan penyelamat tiba.

“Kami pilih JKKKP yang berada di kawasan banjir dan selalu berdepan masalah ini. Jadi saya mengharap-kan kursus bakal diadakan itu memberi impak positif kepada mereka,” katanya.

Beliau berkata demikian ketika ditemui pada Majlis Hari Raya JBPM negeri di Tunjung di sini, semalam.

Menurutnya, pihaknya sedang melakukan kajian memastikan proses menyelamatkan mangsa dilakukan dalam tempoh singkat.

“Bagi semua balai bomba di Kelantan, sudah ditetapkan tempoh kurang 10 minit untuk tiba di lokasi menyelamatkan. Jika gagal dipatuhi, ia boleh mengundang risiko kepada mangsa,” katanya.